

POLISI PLATFOM BLONG GRAON MO JASTIS PATI (GJP)

2016 JENEROL ELEKSEN

BIGFALA TINGTING

1. Gohed blong soemaot stret fasen blong save mekem gudfala lidaship olsem wan MP mo wan nasonal lida
2. Jenisim Konstityusen mo ol loa blong stopem politikol instabiliti mo enkarejem ol gudfala fasen blong mekem politik (“political reform”)
3. Leftemap jastis sistem blong enfosem ol loa blong kantri – mekem se evriwan i mas folem loa
4. Promotem “gud gavenens” mo “transparensi” blong save katem daon korapsen
5. Givim stret badjet long Malvatumauri, Dipatmen blong Lands mo Kastom Land Manejmen Ofis blong save implimentem land rifom we yumi bin mekem finis
6. Mekem rivi long pablik sevis blong mekem ol wokman blong Gavman i kam moa efektif mo prodaktiv
7. Leftemap agrikalja, “food processing” mo “value adding” olsem stampa blong ekonomik developmen
8. Leftemap helt blong populesen thru long stret kakae, moa sports aktiviti mo wan gudfala helt sevis
9. Mekem rivi long edukesen sistem blong leftemap standad blong edukesen
10. Mekem se Gavman i spendem mane long wan fasen we i stret folem intres blong pablik, mo yumi evriwan i save long hem

GJP HEMI ONLI POLITIKOL PATI LONG VANUATU WE I STAP PROMIS MO I STAP MEKEM FINIS OLGETA SAMTING IA:

1. **Yusum kraeteria blong jusum ol kandidat blong hem:** evri kandidat blong GJP oli mas gat (1) longfala histori blong mekem fri sevis blong givhan long komuniti blong olgeta, mo (2) nogat eni histori blong misyusum mane long eni wok we oli holem o long level blong komuniti. GJP Eksekutiv i skrinim evri kandidat blong mek sua se oli ol stret lida we oli fitim kraeteria ia bifo oli save kam wan kandidat blong pati.
2. **Karemaot 2 million vatu long salari blong MP mo ademap wetem alokesen mo yusum evri mane ia blong mitim ol nid blong komuniti mo mekem ripot blong hem afta.** MP mo komiti blong hem bae oli no kontrolem alokesen - bae Eksekutiv blong Pati nomo i risivim ol rikwes we komiti blong MP i apruvum mo givimaot mane folem ol rikwes ia. Eksekutiv bae i rikodem evri mane we hemi givimaot, mo long stat blong evri yia bae i putumaot wan ripot blong spending blong alokesen blong MP long las yia olsem wan posta we bae oli save hangem long evri ples long konstituensi. **Fasen ia, evri MP blong GJP oli stap mekem finis long las 4-yia term**
3. **Sapotem edukesen blong ol pikinini long evri konstituensi we i gat MP long hem wetem 1,000,000 vatu evri yia aot long alokesen blong MP.** Bae yumi no helpem ol pikinini blong ol sapota nomo be bae yumi givhan long ol pikinini we oli gat gudfala mark mo faenansol o spesel nid. **Fasen ia, evri MP blong GJP oli stap mekem finis long las 4-yia term**

4. **Vot agensem eni tingting o bil blong inkrisim salari blong ol MP blong ful 4-yia term blong nekis Palemén, be sapatem tingting blong leftemap MP alokesen. Fasen ia, GJP i stap mekem finis long las 6 yia**
5. **Wok insaed long eni Ministri we GJP i holem blong jenisim evri loa we i givim janis blong wan Minista i save givim wok o skolaship o posisen folem politik.** Polisi blong GJP hemi blong mekem se evri apoenmen blong wok long wan pablik ofis hemi mas folem kraeteria, mo blong mekem se i no save gat politikol inteferens long fasen blong givimaot ol skolaship, long save go insaed long wan skul, long ol posting blong tija mo nurs, etc

JENISIM KONSTITYUSEN MO OL LOA BLONG STOPEM POLITIKOL INSTABILITI MO ENKAREJEM OL GUDFALA FASEN BLONG MEKEM POLITIK (“POLITICAL REFORM”)

1. Jenisim Konstityusen blong:
 - i) karemaot raet blong ol MP blong save jenisim pati o krosem floa blong Palamen olsem we oli wantem
 - ii) katem daon hamas mosen blong nogat trast i save gat long wan term blong Palamen, mo mekem fasen blong putum wan mosen blong nogat trast i kam moa strong (eksampol, mekem se 27 MP mas saenem mosen long fored blong Spika long ofis blong hem)
 - iii) putum kraeteria long ol naturalized sitisen we oli wantem kontest
 - iv) karemaot paoa blong wan minority gavman i save askem Presiden blong disolvem Palamen
2. Pasem wan niufala loa blong:
 - i) putum kraeteria blong save stanemap wan niu politikol pati
 - ii) mekem se ol politikol pati i mas talemaot se oli kasem mane blong olgeta wea
 - iii) putum kraeteria blong hamas sapat wan politikol pati o wan indipenden kandidet i mas gat blong save kontestem wan eleksen
3. Jenisim *Representation of the People Act* blong putum moa kraeteria blong wan man o wan woman i save stanap olsem wan kandidet long wan eleksen
4. Mekem sistem blong registresen blong vota i kam moa gud, blong givim moa janis long ol pipol i save rejista blo vot, mo blong katem daon ol kruked fasen blong vot
5. Jenisim *Representation of the People Act* blong mekem se taem wan MP i lusum jea blong hem, “runner up” blong hem long las eleksen otomatikli bae i tekem jea ia (stopem nid blong gat by-eleksen)
6. Jenisim *Representation of the People Act* long saed blong ol eleksen blong putum ol klia rul long wanem hemi wan “kampen”, wanem wan “caretaker” Gavman i save mekem, mo hao wan propos kandidet i save givim samting long ol vota
7. Stat blong mekem riviú long lo mo ol konsaltesen wetem pablik long tingting blong:
 - i) sherem gud bakagen ol jea blong ol MP folem populesen mo namba blong aelan long wan-wan konstituensi
 - ii) brekem ol bigfala konstituensi wetem fulap jea i go long ol wan-wan smol konstituensi (olsem Tanna, Efate, Santo, Malakula)
8. Pasem niufala Standing Oda blong Palemén we i redi finis
9. Pasem wan loa blong mekem se evri MP i mas mekem ripot long spending blong alokesen blong olgeta
10. Mekem ol “Temporary Special Measure” blong risevem one-third blong ol jea long evri Provinsel Kaonsel blong ol woman

11. Jenisim evri loa we i givim janis blong wan Minista i save givim wok o skolaship o posisen folem politik: blong mekem se evri apoenmen blong wok long wan pablik ofis hemi mas folem kraeteria, mo blong mekem se i no save gat politikol inteferens long fasen blong givimaot ol skolaship, blong entrens long wan skul, long ol posting blong tija mo nurs, etc
12. Pasem wan niufala “Executive Power Act” blong talem stret wanem ol disisen we wan Praem Minista mo wan Minista i save mekem, mo wanem ol disisen we Kaonsel blong Minista nomo i save mekem (blong putum limit long disisen we wan PM o wan Minista i save mekem withaot apruvel blong Kaonsel)

LEFTEMAP JASTIS SISTEM BLONG ENFOSEM OL LOA BLONG KANTRI MO PROMOTEM “GUD GAVENENS” MO “TRANSPARENSI” BLONG SAVE KATEM DAON KORAPSEN

1. Stanemap ‘nasonal integriti komiti’ we i gat insaed ol reipresentativ blong Gavman mo ol NGO blong kodinetem implimentesen blong ol rekomendesen blong 2014 Vanuatu nasonal integriti ripot, mo givim wan badjet long olgeta blong mekem wok
2. Leftemap wok blong Polis long saed blong “criminal investigation”
3. Gohed blong impruvum “computerized case management system” blong givhan long Polis, Pablik Prosekyuta, ol Kot mo pablik blong save manejem gud ol kes
4. Wok wetem Judiseri blong spidimap fasen we hemi stap dil wetem ol kes
5. Putum evri staf we Judicial Services Commission i stap rekomendem apoenmen blong olgeta long Pefomens Kontrakt (olsem Atoni Jenerol, Pablik Prosekyuta, Pablik Solisita mo Ombudsman)
6. Jenisim *Ombudsman Act* mo *Leadership Code Act* blong leftemap paoa blong Ombudsman blong panisim ol lida we oli brekem *Leadership Code*
7. Leftemap bajet mo wok blong Odita Jenerol, blong hemi save mekem gud wok we Konstityusen i givim long hem
8. Mekem wan ful investigesen mo odit long evri State Owned Enterprises olsem NISCOL mo AVL mo prosekyutum eni man we i stilim mane long ol kampani ia
9. Mekem se Radio Vanuatu i mas rijim evri aelan blong Vanuatu
10. Stanemap Vanuatu Nasonal Media Kaonsel blong givimaot ol brodkas laesens blong mekem radio o TV (karemaot wok ia long VBTC)
11. Pasem loa blong “Freedom Of Information” we Gavman i stap wok long hem naoia
12. Pasem wan loa blong protektem ol “whistle blowers” we oli wok long Gavman (blong protektem ol wokman blong Gavman we oli ripotem korapsen insaed long Gavman)
13. Karemaot paoa blong Polis Komisina mo Minista blong Intenol Afeas blong mas apruvum ol maj o demonstresen: wan grup we i wantem mekem maj i mas talemaot nomo long Polis blong oli save mekem sikiuriti long maj

GIVIM STRET BADJET LONG MALVATUMAURI, DIPATMEN BLONG LANDS MO KASTOM LAND MANEJMEN OFIS BLONG SAVE IMPLIMENTEM LAND RIFOM WE YUMI BIN MEKEM FINIS

1. Implimentem fulwan ol niufala loa blong graon we GJP i pasem finis long Palamen we oli fulfilim ol resolusen blong Land Samit mo protektem gud ol kastom graon blong Vanuatu folem ol tingting blong Konstityusen.

Ol niufala loa blong graon i mekem ol samting ia:

- i) Karemaot paoa blong Minista blong saenem lis long bihaf blong ol kastom ona sipos ol kastom ona oli no agri
 - ii) Mekem se fasen blong mekem lis hemi moa fea long ol kastom ona mo i gat tingting blong ol kastom ona insaed blong mekem se bae i save gat ol developmen we oli moa gud mo oli moa sastenebol long Vanuatu
 - iii) Protektem State Land (graon blong Gavman)
 - iv) Mekem se yumi mas aedentifaem ol stret kastom ona folem ol stret rul blong kastom; hemia long nakamal mo long “custom area land tribunal”
 - v) Mekem se ol disisen blong ol nakamal mo ol “custom area land tribunal” long saed blong onaship blong kastom graon oli gat paoa mo i no save gat apil long olgeta i go long kot (yu save apil long proses nomo i go lo Aelan Kot)
 - vi) Mekem se Palemen i mas ‘consult’ o askem tingting blong Malvatumauri sipos hemi wantem jenisim ol loa blong graon bakagen (amendment blong artikol 30 blong Konstityusen)
2. Stanemap wan ofis blong givim ligol, faenansol mo bisnis advaes long ol lanona long saed blong hao oli save yusum graon blong olgeta
 3. Amendem *Valuation of Land Act* blong givim paoa long Valuer General blong mekem odit long ol lis we oli stap finis mo putum stret valiu blong olgeta, mo mekem se lessee i mas stat blong pem rent folem stret valuesen ia
 4. Pasem mo enfosem *Waste Management Regulation* mo *Pollution Control Regulation*; leftemap badjet blong Dipatmen blong Envaeronmen blong save enfosem ol loa blong protektem envaeronmen
 5. Mekem ol “Physical Plan” blong evri aelan folem land-yus planing we i stap finis
 6. Pasem wan loa blong subdivisen blong mekem se i gat ol “minimum standard” blong olgeta we oli wantem mekem ol subdivisen long saed blong spes blo wan-wan graon, stret infrastrukja (olsem rod, wota saplae mo laet) mo ol grin spes mo ol spes blong ol komuniti fasiliti olsem skul, etc
 7. Protektem ol las grin spes long Port Vila mo Luganville
 8. Givim moa graon long Port Vila mo Luganville long han blong komuniti, blong komuniti i save yusum blong grin spes o blong bildim ol market o ples blong miting long hem
 9. Mekem wan investigesen blong ol land diling we i involvem ol staf blong Dipatmen blong Land mo ol foma Minista mo politikol apoenti blong faenemaot sipos i gat fraud o “improper process” long fasen blong givimaot ol lis long intres blong olgeta nomo

MEKEM SE BADJET BLONG GAVMAN I MAS LUK LONG OL “BASIC NEEDS” FASTAEM

1. Ri-aloketem nasonal badjet blong praeoritaesem olgeta “basic needs” ia:
 - i) evri komuniti long Vanuatu i mas gat sef wota saplae
 - ii) setemap gudfala sistem blong mentenem rod long evri aelan
 - iii) fiksimap gud bakagen evri Gavman fixed asset (haos blong polis, haos blong tija, ol helt fasiliti, ol skul, ol gavman ofis, etc). Hemia i minim tu se bae Gavman i mas stretem isiu blong sam blong ol graon we ol asset ia i stap long hem
 - iv) ekstendem skul fi subsidy kasem yia 8

2. Katem daon kost blong trak mo fuel:
 - i) Salem evri trak blong Gavman, be livim nomo 2 trak blong wan-wan Ministri (cabinet) mo 2 trak blong wan-wan dipatmen (PM nomo bae i gat 1 trak bakagen blong sikuiriti bak-ap); mo livim tu ol trak blong sam “essential services”
 - ii) SG blong wan-wan Provins bae hemi bos blong evri trak blong Gavman long Provins
3. Putum moa kontrol long intanasonal travel we Gavman i pem
4. Stat blong yusum sistem blong “gender budgeting” blong luksave hamas pablik fand Gavman i stap spendem long nid blong ol woman
5. Stat blong yusum sistem blong “island-based budgeting” blong luksave hamas pablik fand Gavman i stap spendem long wan-wan aelan

KATEM DAON KOST BLONG OL POLITISEN MO GAVMAN

1. Mekem se bae i nogat eni inkris long ol salari blong ol MP blong ful 4-yia term blong nekis Palemén
2. Karemaot (ripilim) loa we i givim Gavman “pension” long ol olfala Praem Minista, Presiden mo Presiden blong Malvatumauri blong ful laef blong olgeta
3. Ripilim evri niufala benefit mo politikol staf posisen we foma PM Sato i bin krietem
4. Katem namba blong ol politikol staf long wan Ministri i go long 9 (naoia hemi 18), mo mekem ful riviú blong ol benefit anda long *Official Salaries Act*
5. Lukluk long evri samting we Gavman i spendem mane long hem, afta katemaot ol samting we i nogat tumas nid long hem
6. Mekem se Ofis blong Praem Minista i mas apruvum evri ovasi trip we Gavman i pem, blong kontrolem mo katem daon vatu we Gavman i spendem long ol ovasi trip
7. Putum praeriti long sheftem ol Gavman ofis we i stap rent naoia long ol praevet bilding i go long ol bilding we Gavman i ownem. Bae i nid blong fiksimap ol Gavman bilding blong mekem hemia, mo tu yusum niufala Convention Centre

LUKLUK BAK LONG REVENIU KOLEKSEN SISTEM BLONG GAVMAN

(Dipatmen blong Customs, Rates and Taxes) blong mekem i kam moa strong mo i save kolektem evri tax we evriwan i mas pem folem loa

MEKEM RIVIÚ LONG PABLIK SEVIS BLONG MEKEM OL WOKMAN BLONG GAVMAN I KAM MOA EFEKTIV MO PRODAKTIV

1. Mekem wan indipenden riviú long *Public Service Act* mo strakja blong pablik sevis mo jenisim loa mo strakja ia blong mekem wok blong ol wokman blong Gavman i kam moa efektiv mo prodaktiv
2. Lukluk long hao blong mekem ol defren komisen blong ol wokman blong Gavman (Public Service, Police Service, Teaching Service, etc) oli wok moa gud tugeta
3. Jenisim *Government Act* blong karemaot posisen blong ol Daarekta Jeneral
4. Putum evri pablik seven long pefomens kontrakt, mo leftemap sistem blong save monitarem gud wok mo pefomens blong olgeta
5. Mekem se oltaem i mas gat “in service” training blong evri wokman blong Gavman, inkludum ol tija mo ol helt woka
6. Mekem se Gavman i pemaot yia blong evri wokman blong hem (“severance pay”) long en blong evri yia
7. Dvelopem wan nasonal “Human Resource Plan”

8. Mekem se evri pablik seven mo elektet ofisel (olsem MP) i mas gat wan helth jek evri yia

LEFTEMAP STANDAD BLONG EDUKESEN

1. Stanemap wan Nasonal Taskfos long saed blong Edukesen blong daarektem wok blong jenisim mo leftemap ful edukesen system
2. Stretem salari skel blong ol tija blong luksave olgeta we oli gat hae kwalifikesen mo leftemap namba blong ol kwalifae tija insaed long klasrum
3. Pemaot ol aotstanding salari mo severens pei blong ol tija
4. Stat blong lukluk blong pem ol kwalifae pri-skul tija
5. Ekstendem skul fi sabsidy kasem yia 8
6. Implimentem fulwan niufala nasonal kerikulum folem “Nasonal Kerikulum Visen Stetmen”, we i gat insaed kastom save, Kristien prinsipol, “civic” edukesen, agrikalja, bisnis, etc
7. Mekem edukesen sistem i tijim fulap lanwis folem wanem we Nasonal Lanwis Polisi blong Nasonal Lanwis Kaonsel i talem. Tijim pikinini blong save rid mo raet long lanwis we hemi stap toktok long hom blong hem, blong leftemap literisi mo kaljoral aedentiti
8. Mekem se program blong ol Anglophone mo Francophone studen hemi “equivalent” long saed blong hamas yia oli mas mekem long sekonderi bifo oli save go long univesiti
9. Mekem se ol skolaship we Gavman i stap givim i stret long “cost of living” long ol defren kantri we ol studen i stap long hem
10. Putum wan kondisen long ol studen we oli kasem Gavman skolaship blong oli mas go wok long wan rurol eria blong 1 yia afta we oli graduet
11. Mekem se i gat moa “tertiary” o univesiti program we ol studen i save mekem insaed long Vanuatu nomo
12. Leftemap ol USP program long Emalus Campus mo long ol USP sab-senta long ol Provins, mo enjkarejem moa sekonderi skul blong yusum USP Preliminary mo Foundation program
13. Leftemap namba blong ol defren kaen teknikal o “skills” program we TVET, VIT mo VRDTCA i stap tijim
14. Sapotem VRDTCA blong leftemap wok mo namba blong ol rurol trening senta; spidimap “certification” blong ol VRDTCA kos wetem Nasonal Qualifications Authority
15. Pasem wan loa blong putum “apprenticeship” sistem long Vanuatu, blong ol kampani i mas karem ol yangfala we oli kamaot long VIT mo ol RTC blong wok blong wan short taem blong givim ekspirians long olgeta
16. Sapotem ol NGO mo ol jioj blong givhan long ol bigfala man mo woman blong save rid mo raet (“adult literacy”)

LEFTEMAP STANDAD BLONG HELT

1. Mekem se evri komuniti long Vanuatu i mas gat sef wota saplae
2. Leftemap badjet blong “primary health care” i kasem sem level olsem “curative health care”, blong yumi evriwan i save jenisim ol fasen blong yumi blong daonem ol sik

3. Stopem ol rabis kakae blong kam insaed long Vanuatu, mo promotem moa ol lokol kakae. Putum tax long ol imported kakae we oli spoelem helt blong yumi mo yusum mane ia blong promotem lokol kakae
4. Rivuim bakagen afta implimentem propos niu strakja blong Ministri blong Helt blong 2010-2011
5. Pemaot ol aotstanding salari mo severens pei blong ol helt woka
6. Fiksimap gud bakagen evri Gavman helt fasiliti mo bildim ol niufala fasiliti long ples we i nogat helt fasiliti kolosap, mo putum ol stret tul blong wok long olgeta. Hemia stat long Port Vila Central Hospital mo Northern District Hospital kam daon long ol Provinsel Helt Senta, ol Dispenseri mo ol Aid Post
7. Mekem se evri Gavman helt fasiliti i mas gat stret staf blo hem:
 - i) Gohed blong trenem fulap niufala nurs mo dokta
 - ii) Mekem se ol nurs mo dokta we oli stap naoia oli mas mekem “in-service training” mo “further education” blong leftemap save mo kwalifikesen blong olgeta
 - iii) Leftemap save mo “skills” blong ol Vilej Helt Woka blo oli save mekem moa helt sevis (eg, givim stik blo TB) mo stat blo givim smol alaoens long olgeta
8. Mekem wan spesel badjet evri yia blo sendem ol sik pipol blong karem ol spesel medikol tritmen ovasi we i nogat long Vanuatu

PROMOTEM NI-VANUATU INSAED LONG BISNIS

Longfala eim: Blong balanssem lokol mo foren onaship blong vatu ekonomi blong save gat nasonal ekonomik sikiuriti mo ekonomik indipendens. Ol step blong mas mekem:

- a) Ni-Vanuatu i ownem 30% blong vatu ekonomi long 2020
 - b) Ni-Vanuatu i ownem 67% blong vatu ekonomi long 2050.
1. Jenisim Nasonal Invesmen Polisi, loa blong VIPA mo ol narafala loa blong save ajivim longfala eim ia
 2. Karem i kam lo Vanuatu ol gudfala investa nomo we oli gat “reputation, capital mo experience”, mo ol projek we oli fit gud wetem laef blong man ples
 3. Putumbak mo enfosem loa mo polisi we i stap finis long saed blong “reserve list” blong ol bisnis we ni-Vanuatu nomo i save mekem mo ademap sam niufala sekta i go insaed risev lis
 4. Mekem se eni niu foren invesmen long kantri i mas bi wan joen ventja, we ni-Vanuatu i ownem 50%
 5. Stopem eni niu foren-owned retail mo wholesale shop, mo kontrolem olgeta we oli stap finis
 6. Tanem tingting blong turism developmen i go blong promotem turism long saed blong envaeronmen mo kastom long rurol eria we ol man ples i ownem
 7. Sapotem mo promotem ol “micro-credit” skim olsem blong VANWODS mo blong NBV
 8. Pasem wan loa se 40% blong ol infomesen o program we wan lokol media kampani hemi givimaot oli mas mekem long Vanuatu nomo o hemi mas bi abaot Vanuatu (promotem ol lokol artis mo lokol prodaksen)
 9. “Suspendem” o stopem fastaem MSG Tred Agrimen mo MSG “Skills Movement Scheme” mo mekem moa toktok o konsaltesen wetem ol pipol blong Vanuatu blong luk sipos oli wantem ol agrimen ia o no
 10. Stopem evri negosiesen blong joenem PACER+, EPA mo eni narafala intanasonal tred agrimen kasem taem we yumi skelem gud ol agrimen ia long saed blong wanem

bae oli save mekem long yumi long saed blong ekonomi, sosel laef mo envaeronmen blong yumi

LEFTEMAP AGRIKALJA, “FOOD PROCESSING” MO “VALUE ADDING” OLSEM STAMPA BLONG EKONOMIK DIVELOPMEN

1. Stanemap bakagen ful agrikalja ekstensen sevis (olsem we i stap bifo), wetem stret infrastrakja, badjet, staf mo manejmen
2. Stat blong planem bak evri plantesen blong kokonas mo kakao
3. Protektem mo planem moa ol lokol frut mo nat tri blong yumi (olsem nangae, tamanu, etc), mo planem moa ol timba tri blong yumi (olsem waetwud mo had wud), mo planem moa sandalwud
4. Stanemap bakagen “small-holder cattle project” (blong ol buluk) mo sapotem thru long ekstensen sevis
5. Sapotem ol smol-skel fishing projek blong save putum moa fresh fish lo lokol market
6. Sapotem ol projek blong pig mo faol blong save putum moa pig mo faol lo lokol market
7. Mekem ol stret nasonal manejmen plan blong ol defren kaen samting blong solwora we yumi stap kakae mo yusum (fish, lobsta, beche-de-mer, etc)
8. Promotem polisi blong mas mekem 3 garen: wan blong kakae, wan blong salem mo wan blong kastom mo seremoni
9. Stopem yus blong ol kemikel long agrikalja mo diklerem Vanuatu wan kantri we kakae blong hem i “100% organic” (nogat kemikel long hem)
10. Long saed blong infrastrakja divelopmen (olsem ol rod mo ol wof), givim praeoriti long ol projek we i sapotem agrikalja
11. Mekem se Gavman i lisim sam bigfala graon long ol defren aelan mo sab-lisim long ol farma we oli wantem mekem “large-scale commercial agriculture”
12. Mekem se yumi mas prosesem ol lokol kakae blong yumi: givim spesel Gavman sapot long ol “value-adding food industries” thru long “marketing”, “branding” mo yus blong “geographical indication”
13. Givhan long ol fama mo ol prodyusa blong targetem ol “high value niche market” blong ol prodak blong yumi
14. Gazetem ripil blong VCMB Act afta yusum “cess tax” blong setemap wan pension skim blong ol farma we oli exportem ol agrikalja prodakt (olsem VNPF)
15. Stanemap wan nasonal food laboratory
16. Gavman blong lidim wan nasonal program blong “Buy Vanuatu Made” mo “Kakae Aelan Kakae”
17. Mekem ol Provinsel Agrikalja Show evri 1 o 2 yia
18. Mekem se Gavman i yusum lokol kakae nomo long evri fanksen blong hem

PROMOTEM “RENEWABLE ENEJI”

1. Divelopem ol stret teknoloji blong save mekem benzin long kokonas (mo ol narafala samting), mo blong save mekem elektrisiti yusum san (solar) mo riva (micro-hydro)
2. Vanuatu Institut blong Teknoloji mo ol Rurol Trening Senta blong givim trening long saed blong mekem benzin long kokonas (mo ol narafala samting), mo blong stanemap mo mentenem ol masin mo ol enjin blong tanem kokonas i kam long oel mo benzin, mo blong mekem elektrisiti yusum solar mo micro-hydro

GIVIM MOA PAOA LONG MALVATUMAURI MO PROMOTEM KASTOM

1. Leftemap bajet mo wok blong Malvatumauri blong hemi save mekem stret wok blong hem olsem wan Konstityusenel bodi
2. Malvatumauri mo ol Provinsel Gavman Kaonsel blong stretem mo maredem strakja blong olgeta
3. Setemap mo rejisterem ol kaonsel blong jif long vilej, sab-eria, eria mo aelan level, mo givim sapot blong leftemap wok mo rol blong ol jif kaonsel ia blong givhan long Gavman blong mekem sevis deliveri
4. Gohed blong mekem mo yusum ol niufala fasen blong meserem ekonomi, blong luksave kastom ekonomi mo kwaliti blong laef
5. Stat blong mekem ol Provinsel mo Nasonal Arts Festival bakagen evri 4 yia (stat lo 2018)

MEKEM DISENTRALAEESESEN

1. Stat blong pemaot ol graon long evri Provinsel Senta blong mekem i kam pablik land
2. Stat blong muvum ol hed ofis blong ol Dipatmen blong Gavman i go long ol aelan
3. Stat blong implimentem ol rekomendesen blong Disentralesesen Komisen Riviu ripot blong 2009. Wan blong ol rekomendesen ia hemi blong stopem sistem blong Provins mo gobak long system blong ol Lokol Gavman Kaonsel blong wan-wan aelan
4. Yusum E-Government netwok blong disentralesem ol sevis blong gavman olsem blong karem paspot, birth setifiket, etc, blong ol man aelan i nomo nid blong kam long Vila blong karem ol sevis ia

PROMOTEM “DECENT WORK”

1. Mekem se “Tripartite Labour Advisory Council” i hariap blong finisim wok blong hem blong agri long ol niufala jenis long ol leba loa blong yumi (*Employment Act, Trade Unions Act, Trade Disputes Act* mo *Minimum Wage and Minimum Wage Bord Act*); givhan long Council wetem wan badjet
2. Jenisim loa blong givim moa proteksen long ol ni-Vanuatu blong karem wok long Vanuatu (be i no ol forena)
3. Leftemap wok blong Dipatmen blong Leba blong mekem se hemi save enfosem ol loa long saed blong wok
4. Mekem se moa man mo woman Vanuatu i save gat janis o opotuniti blong go long RSE skim blong Niu Silan mo Australia, mo leftemap benefit we ol Ni-Vanuatu i stap karem aot long skim ia

OL SPESEL POLISI BLONG PORT VILA MO LUGANVILLE

1. Ekstendem Munisipol baondri blong Port Vila mo Luganville. Gavman blong pemaot ol graon long ol kastom ona blong mekem i kam pablik lan mo letem blong ol famli mo ol komuniti long tufala taon ia we oli nogat graon yet blong oli save pem sloslo (artikol 81 blong Konstityusen hemi tokbaot hemia long saed blong kastom graon)
2. Pasem wan “National Building Code” wetem ol defren standed kondisen blong ol defren kaen haos. Mekem ol “minimum standard” blong olgeta we i mekem rent haos blong mekem sua se i gat gudfala living space, wota saplae, sanitation, mo helti kondisen blong ol tenant i liv long hem, mo setemap ol “standard rental rate” we wan

landlord i save chagem folem kaen housing we hemi providem. Mekem se i mas gat “wheelchair access” long evri pablik bilding

3. Stanemap wan land rent sistem we i putum defren land rent folem saez blo haos mo graon
4. Putum wan niufala loa blong pablik transpot sekta blong leftemap standad, givim moa benefit long ol operata mo kontrolem praes. Sam tingting i olsem: Nomo givim eni niu laesens blong bas o taxi long Port Vila; Mekem ol kondisen mo standad we evri bas mo taxi i mas folem blong holem wan laesens, mo givhan long ol bas mo taxi blong kasem ol standad ia; Givim jip praes blong benzine mo spare parts long ol bas mo putum praes blong bas i kam daon long 100 vatu bakagen; Lukluk blong stanemap ol spesel “insurance mo savings” skim blong ol operata; Stanemap ol “designated routes” blong ol bas, blong sam bas i mas ron long ol sem rod ia oltaem; Mekem sam spesel bas mo taxi we i save karem wheelchair

OL NARAFALA SOSEL ISIU

1. Sapotem mo givim inaf risos blong wok long ol stampa tingting blong Nasonal Populesen Polisi blong 2011-2020
2. Setemap bakagen “Price Control Unit” blong kontrolem ol praes blong ol samting, mo statem proses blong stanemap wan “Consumer Guarantees Act” blong protektem raet blong ol consumer
3. Putum ej we yu save karemaot vatu blong yu long VNPF i kam daon long 45
4. Givim “duty exemption status” i go long ol NGO o “charity” we oli wok wetem ol disadvantej grup olsem ol disebol pipol

FOREN POLISI

1. Wok wetem ol kantri long saed-saed blong yumi (Solomon Islands, Fiji, Nouvelle-Caledonie mo Australia) blong stanemap ol “maritime boundaries” blong yumi. Tekem kes blong Matthew mo Hunter i go intansonal kot sipos Franis i no agri blong givim ol aelan ia long yumi
2. Katem diplomatic rilesen wetem Indonesia mo stat toktok strong long evri organaesesen long intansonal level (eksampol, MSG, Pasifik Aelan Forum, Unaeted Nesen) mo tu long ol narafala kantri (bilateral level) blong sapotem indipendens blong West Papua
3. Leftemap moa ekonomik mo sosel rilesensip wetem ol “neighbour” kantri blong yumi Nouvelle-Calédonie, Solomon mo Fiji
4. Holem taet mo bildimap RSE skim wetem Niu Silan
5. Wok kolosap wetem Gavman blong Ostrelia blong leftemap namba blong ol ni-Vanuatu we oli save go wok long “seasonal labour” long Ostrelia
6. Lukluk bakagen long nid blong gat ol konsul mo ambasada blong yumi long ol narafala kantri folem hamas mane yumi stap spendem long olgeta, wanem benefit oli karem blong yumi, mo “integrity” blong nem blong Vanuatu ovasi

STRETEM SITISENSHIP

1. Stopem evri program we i salem paspot blong Vanuatu, olsem CIIP mo PR Program
2. Mekem wan investigesen mo odit long evri Vanuatu paspot mo kanselem evri paspot we i no mitim rikwaemen blong Konstityusen

PROMOTEM MOA SPORTS AKTIVITI

1. Givim manejmen blong ol sport fasiliti blong Gavman long Port Vila mo Luganville i go long ol Nasonal Federesen mo ol komuniti. Eksampol long Port Vila: Stade mo Kawenu Fil i go long VFF, Ex-FOL i go long basketbol mo volebol, Freswota Fil i go long VFF mo Freswota Indijenes Kaonsel
2. Givim manejmen blong ol aelan sports lig mo ol provinsel sports lig i go long ol Nasonal Federesen, mo givhan long ol Nasonal Federesen blong mekem servis diliveri long saed blong evri sports disiplin i go long evri aelan
3. Krietem wan niu posisen anda long Ministri blong Edukesen blong wan ‘Zone Sports Edukesen Advasesa’ (ZSEA) blong givhan blong divelopem sports long evri skol (wok blong wan ZSEA bae i kavremap sem eria we wan ZCA i stap wok long hem). Ol Nasonal Federesen i save wok wetem ol ZSEA blong promotem mo divelopem sports insaed long ol skol
4. Divelopem ol nasonal sports fasiliti blong redi blong Vanuatu i hostem 2017 South Pacific Mini Games